

हल्दी धाटी में समर लड़यो,  
वो चेतक रो असवार कठे ?  
मायड़ थारो वो पुत कठे ?  
वो एकलिंग दीवान कठे ?  
वो मेवाड़ी सिरमौर कठे ?  
वो महाराणा प्रताप कठे ?

मैं बाचों है इतिहासां में,  
मायड़ थे एड़ा पुत जण्या,  
अन-बान लजायो नी थारो,  
रणधीरा वी सरदार बण्या,  
बेरीया रा वरसु बादिला,  
सारा पड़ ग्या ऊण रे आगे,  
वो झुक्यो नहीं नर नाहरियो,  
हिन्दवा सुरज मेवाड़ रतन  
वो महाराणा प्रताप कठे ?  
मायड़ थारो वो पुत कठे ?  
वो एकलिंग दीवान कठे ?  
वो मेवाड़ी सिरमौर कठे ?  
वो महाराणा प्रताप कठे ?

ये माटी हल्दीधाटी री,  
लागे केसर और चंदन है,  
माथा पर तिलक करो इण रो,  
इण माटी ने निज वंदन है.

या रणभूमि तीरथ भूमि, द  
र्शन करवा मन ललचावे,  
उण वीर-सुरमा री यादा,  
हिवड़ा में जोश जगा जावे,  
उण स्वामी भक्त चेतक री टापा,  
टप-टप री आवाज कठे ?  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

संकट रा दन देख्या जतरा,  
वे आज कुण देख पावेला,  
राणा रा बेटा-बेटी न,  
रोटी घास री खावेला  
ले संकट ने वरदान समझ,  
वो आजादी को रखवारो,  
मेवाड़ भौम री पति राखण ने,  
कदै भले झुकवारो,  
चरण में धन रो ढेर कियो,  
दानी भामाशाह आज कठे ?  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

भाई शक्ति बेरिया सूं मिल,  
भाई सूं लड़वा ने आयो,  
राणा रो भायड़ प्रेम देख,  
शक्ति सिंग भी हे शरमायों,

औ नीला घोड़ा रा असवार,  
थे रुक जावो-थे रुक जावो  
चरणा में आई पऱ्डियो शक्ति,  
बोल्यो मैं होकर पछतायो,  
वो गळे मिल्या भाई-भाई,  
जूं राम-भरत रो मिलन अठे,  
मायड़ थारो वो पूत कठे ?  
वो एकलिंग दीवान कठे ? वो महाराणा  
प्रताप कठे ?, वो मेवाड़ी सिरमौर कठे ?

वट-वृक्ष पुराणो बोल्यो यो,  
सुण लो जावा वारा भाई  
राणा रा किमज धरया तन पे,  
झाला मन्ना री नरवारी,  
भाळो राणा रो काहे चमक्यो,  
आँखां में बिजली कड़काई,  
ई रगत-खळगता नाळा सूं,  
या धरती रगत री कहळाई,  
यो दरश देख अभिमानी रो,  
जगती में अस्यों मनख कठे ?  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

हळदीघाटी रे किला सूं,  
शिव-पार्वती रण देख रिया,  
मेवाड़ी वीरा री ताकत,  
अपनी निजरिया में तौल रिया,

बोल्या शिवजी-सुण पार्वती,  
मेवाड़ भौम री बलिहारी,  
जो आछा करम करे जग में,  
वो अठे जनम ले नर नारी,  
मूं श्याम एकलिंग रूप धरी,  
सदियां सूं बैठो भला अठे  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

मानवता रो धरम निभायो है,  
भैदभाव नी जाण्यो है,  
सेनानायक सूरी हकीम यूं,  
राणा रो चुकायो हे  
अरे जात-पात और ऊंच-नीच री,  
बात अया ने नी भायी ही,  
अणी वास्ते राणा री प्रभुता,  
जग ने दरशाई ही,  
वो सम्प्रदाय सदभाव री,  
मिले है मिसाल आज अठे,  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

कुम्भलगढ़, गोगुन्दा, चावण्ड,  
हळदीघाटी ओर कोल्यारी  
मेवाड़ भौम रा तीरथ है,  
राणा प्रताप री बलिहारी,

हे हरिद्वार, काशी, मथुरा, पुष्कर,  
गलता में स्नान करा,  
सब तीरथा रा फल मिल जावे,  
मेवाड़ भौम में जद विचरां,  
कवि “माधव नमन करे शत-शत,  
मोती मगरी पर आज अठे,  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

अरे आज देश री सीमा पर,  
संकट रा बादळ मंडराया,  
ये पाकिस्तानी घुसपेठीया,  
भारत सीमा में घुस आया,  
भारत रा वीर जवाना थे,  
याने यो सबक सिखा दिजो,  
थे हो प्रताप रा ही वंशज,  
याने यो आज बता दिजो,  
यो कश्मीर भारत रो है,  
कुण आंख दिखावे आज अठे  
मायड़ थारो वो पूत कठे ?  
वो एकलिंग दीवान कठे ? वो मेवाड़ी सिरमौर  
कठे ? वो महाराणा प्रताप कठे ?

हल्दी धाटी में समर लड़यो,  
वो चेतक रो असवार कठे ?  
मायड़ थारो वो पुत कठे ?  
वो एकलिंग दीवान कठे ?

वो मेवाड़ी सिरमौर कठे ?  
वो महाराणा प्रताप कठे ?

Source: <https://www.bharattemples.com/mayad-tharo-vo-puth-kathe-in-hindi/>



# Bharat Temples

Complete Bhajans Collections - Download Free Android App

[https://play.google.com/store/apps/details?id=com.numetive\\_bhajans](https://play.google.com/store/apps/details?id=com.numetive_bhajans)

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZJyhhKzSUD-Lt9Tw>